

Personahe di Januari 2013 Pianista Debora Helder ta haci entrega di donacion na Biblioteca Nacional Aruba



Riba e foto por mira directora di Biblioteca Nacional, Sra. Astrid Britten, hunto cu e pianista Debora Helder.

ORANJESTAD - Ya casi ta dos decada pasa cu bou encargo di entre otro Sr. Ido Yanes q.e.p.d., Sr. Ito Tromp y Sr. Emile Kelkboom, a yuda recauda fondo pa adkiri e Grand Piano di Biblioteca Nacional atraves di benta di CD di e Concierto di Siglo, cual na man di Padu Lampe, Norman Moron y Dominco Herrera a encanta amantenan di musica cu un biahe rond Reino Hulandes.

Y awe, danki na e donacion cu New India Assurance Representative N.V. su Personahe di Calendario di januari 2013, pianista Debora Helder, a haci na encargo di e empresa di seguro, e Grand Piano di nos Biblioteca Nacional ta ricibi su merecido atencion cu cual e por celebra di por cumpli cu su miho posibel resolucionnan pa e aña venidero.

E echo cu New India Assurance Representative N.V. ta cumpli mey siglo di existencia fructifero na Aruba y cu e Calendario special produci pa e empresa di seguro awor a sali pa e di 15 aña consecutivo como obsekio di gratitud na nos pueblo y pa celebra potencial humano di nos

comunidad, ta duna motibo amplio pa celebracion. Y manera Sra. Joy Raghunath, directora di New India Assurance Representative N.V. a expresa referente di esaki: "E miho manera pa como empresa celebra bo gratitud pa tur bo bendicionnan, ta na prome luga atraves di ta gradici den oracion tanto pa loke ta bon, como tambe pa e retonan cu ta ponebo crece. Y loke ta sumamente importante ta pa semper bo corda duna bek cu loke bo por, pa sirbi desaroyo y progreso di e comunidad cu ta brindabo e confianza di ta haci uzo di bo servicio y productonan."

E Calendario di Personahe ta habri aña 2013 cu e hoben pianista prometedor Debora Helder pa Aruba por ta consciente di e profundidad di nos gran potencial musical cual ta e cuna di e alegria sin igual cu ta haci nos e unico One Happy Island na henter mundo. Pa e celebracion di e revelacion di e Calendario di Personahe na november ultimo, a transporta e Grand Piano di Biblioteca Nacional pa asina e resona bou di man di Debora den Crystal Theatre y eynan e piano tecnico respon-

sabel pa bolbe stem e instrumento despues di su transport, a detecta cu ya mester cuminsa upgrade e piano pa e no perde e resonancia colorido di su encanto.

Na momento cu Sra. Astrid Britten, Directora di Biblioteca Nacional a ricibi e bon noticia cu New India Assurance Representative N.V. lo obsekia e reparacionnan aki, el a keda hari so, sin sa mas con pa expresa su alegria. "E piano aki ta di Pueblo di Aruba," Sra. Britten a remarca di forma entusiasmo.

"Y como Pueblo nos merece di por tin un luga caminda hende tin acceso pa practica tocamento di piano y tambe pa por disfruta di conciertonan atraves di un instrumento cu ta asina unico den tur loke e por brinda na profundidad musical."

Riba luna di januari di e Calendario di Personahe por aprecia con Debora Helder ta comparti su alegria musical atraves di su asina yama SoulPainting y poema afirmativo cual den combinacion ta enfoca netamente riba continuacion pasiona di e revelacion di e persona su donnan y potencial humano. □